

Apirilaren 25ean
4. PAZKO IGANDEA

Bokazioen alde otoitz egiteko Mundu Jardunaldia

Misio herrietako bokazioen jardunaldia

“Ni, norentzat?”

Agurra

Heriotzaren lokarriak etenik Jesu Kristo berpiztu duen Jainko bizi-emailea izan bedi zuekin.

Sarrerako oharpena

Kristoren Piztuera ospatzen jarraitzen dugu eta gaurkoan Beraren Artzain on izateari begiraten diogu. Berak zaintzen gaitu, berak babesten. Badakigu zenbat egin duen gure alde!

Gaur, Bokazio aldeko Mundu jardunaldia dugu: “Ni, norentzat?” goiburuarekin. Eta, gainera, Misio herrietan apaiz izateko prestatzen direnei laguntzeko eskaintzen dugu otoitza eta diru-bilketa. Munduko bazter guztietan izan daitezen Kristo Artzain onaren irudi izango direnak.

Bataio-urez zirtatzea

Senide maiteok, egin diezaiogun otoitz Jainko geure Jaunari, Pazko gau santuan bedeinkatu genuen ura Bataioaren oroipenez geure burua zirtatzeko erabiltzera goazen honetan. Ur honek berrizta gaitzala, hartu dugun Espirituari beti leial izan gakizkion.

Ura bedeinkatu nahi bada, ikusi otoitza Meza-liburuko 1286. orrian.

Kantu egoki bat kantatuz, herria zirtatuko du apaizak.

Jainko ahalguztidunak garbi gaitzala bekatutik eta, Eukaristia honen bidez, bere erreinuko mahaian jartzeko gai egin gaitzala. Amen.

Erruki, Jauna. Erruki, Jauna.

Kristo, erruki. Kristo, erruki.

Erruki, Jauna. Erruki, Jauna.

Aintza zeruetan

Kanta dezagun aintzazko gorazarrea, gure alde otoitz egiteko Aitaren eskuin aldean dagoen Jesu Kristo Jaunari dei eginez.

Otoitza

**Jainko ahalguztidun betierekoa,
eraman gaitzazu zeruko pozetan partaide izatera, fededunen
artalde apal hau hel dadin
beraren artzaina, heriotza garaiturik, iritsi den ospera.
Zure Seme Jesu Kristo gure Jaunaren bitartez,
Zurekin eta Espiritu Santuarekin batean
Jainko eta errege bizi baita gizaldi eta gizaldietan.**

Hitzaren liturgiari oharpena

Apostoluen inguruan sortutako elkartearen testigantza, aberasgarri dugu gaur senide elkartasunean bizitzeko. Jesus fedez onartzeak, egiazko bizia ematen digu.

Lehenengo irakurgaia (Eg 4, 8-12)

Apostoluen Eginak liburutik

Egun haietan, Pedrok, Espiritu Santuaz beterik, esan zuen: «Herriko agintari eta zaharrok, gaur, gaixo bati eginiko mesedea dela eta, noren eskuz sendatu den galdetzen diguzue; bego, beraz, argi zuentzat guztiontzat eta Israel herri osoarentzat, zuek gurutziltzatu eta Jainkoak hilen artetik piztu zuen Jesu Kristo Nazaretarraren izenean duzuela gizon hau zeuen aurrean sendaturik. Jesus hauxe da

zuek, “etxegileok, baztertutako harria, giltzarri gertatua”. Honengan bakarrik dugu salbamena, ez baitigu Jainkoak gizon-emakumeoi beste inor eman eguzkipean, gu salba gaitzakeenik».

Erantzun-salmoa (*Sal* 118 [117], 1 eta 8-9. 21-23. 26 eta 28-29)



- ∞. Eskerrak Jaunari, ona baita, ‘
haren maitasuna betikoa**a** baita.
Hobe da Jaunagan babestea ‘
gizakiaz fidatzea**a** baino;
hobe Jaunagan bab**est**ea
handikiez fidatzea**a** baino. ℞.
- ∞. Eskerrak Zuri erantzun didazulako, ‘
nire salbatzaile izan zare**l**ako.
Etxegileek baztertutako harria ‘
giltzarri gert**at**u da.
Jaunak egin **du** hori,
gure begien harr**ig**arri. ℞.
- ∞. Bedeinkatua Jaunaren izenean datorrena! ‘
Jaunaren etxetik bedeinkatzen zait**uz**tegu.
Zu zara nire Jainko, eskerrak Zuri! ‘
Gora Zu, ene Jain**ko** hori!
Eskerrak Jaunari, on**a** baita,
haren maitasuna betikoa**a** baita. ℞.

Bigarren irakurgaia (1 Jn 3, 1-2)

San Joan Apostoluaren lehenengo gutunetik

Senide maiteok: Begira zenbaterainoko maitasuna agertu digun Aitak, Jainkoaren seme-alaba izena baitaramagu, baita izana ere. Hona zergatik munduak ez gaituen ezagutzen: Aita ere ezagutu ez zuelako. Ene maiteok, orain Jainkoaren seme-alaba gara; gero izango garena oraindik ez da agertu. Badakigu, Kristo agertuko denean, haren antzeko izango garela, den bezalakoa ikusiko baitugu.

Aleluia (Jn 19, 14)

V. Ni naiz artzain ona, **di**o Jaunak;
ezagutzen ditut neure **ardi**ak,
eta neureek ezagutzen **naute** Ni. R.

Ebanjelioa (Jn 10, 11-18)**Homiliarako argibideak**

Ezagutzen naute nire ardiek

Bizitzari begiratzeko kristau ikuspegia lausotzen den heinean, gero eta zailago gertatzen da gizakiari buruz eta bere bokazioari buruz mintzatzea. Gehienek uste dute, baita fededun askok ere, bokazioaren hori apaiz eta monjen kontua dela. Ahaztu egiten zaigu, gizaki oro, fededun nahiz fedegabe bizi garenez gero, munduan egiteko batekin gaudela, bokazio batekin. Horixe da, izan ere,

bakoitzak bere baitan itxi gabe besteen zerbitzura jartzeko, besteentzat emana bizitzeko era.

Bakoitzaren bokazioa da, elkarteari geure burua eskaintzeko ere, eliz elkarteari, gizarteari, bizi dugun egoerari. Horregatik, bokazioaren funtsa zerbitzua da, gure kasuan, Jainkoak zerbitzurako egiten digun deia. Norentzat gara, egin gaituen Aitarentzat ez bada, salbatu gaituen Kristorentzat ez bada eta, santutzen gaituen Espiritu Santuarentzat ez bada?

Izan ere, Jesusek, Artzain Onak, gugatik bizia ematen duenak gogoberotzen gaitu, bere bizi bera bizi dezagun. Berarengan aurki dezagun egiazko zorionaren, salbamenaren, iturria. Berak aberasten gaitu bere hitzez Aitaren deia “entzun, bereizi eta bizitzeko”.

Bokazioaren erroan dago fedea: sinestea norbere buruaz ahaztea da, erosotasunak utzi eta gure bizitzaren erdi muin Kristo aitortzea. Bokazioa egintza zehatzak baina harago doa: egintzak lotzen eta zentzuz betetzen dituen, eragiten dituen da bokazioa, deia. Kristau izateko era pertsonala da bokazioa: dena delakoa izan gure bizi era konkretua, guztietan sentitu behar gara deituak eta bidaliak.

Kristau bokazioa, erakartzen duen maitasun-deia da, geure baitatik ateratzen gaituena, bidean jartzen gaituena. Dei horri erantzutea ez da kontu pribatua edo intimista; ez da emozioei erantzunez martxan jartzea. Deia konpromisoa da, bete-betea, egiazkoa. Jainkoaren Erreinua munduan gauzatzeko konpromisoa. Aitari begiratzetik sortzen den bokazioa, senideei begira gauzatzen da: kontenplazioak garamatza egiazko karitatezko bizitzara. Hori da kristau bokazio guztien oinarria. Eukaristia elkarrekin ospatzeak sendo gaitzala Kristori jarraitzeko bokazioan.

Jainkoaren herriaren otoitza

Senideok: gure begiak Kristori, gure arimen artzain dugunari zuzendurik, jar ditzagun Haren eskuetan konfiantza osoz, gizakien beharrak:

Erantzuna: Entzun Zuk, Kristo, herri honen oihua!



En - tzun, Zuk Kris - to, he - rri ho - nen oi - hu - a.

—Gotzainek, apaizek eta diakonoek zintzo zain dezaten beren eskuetan jarriak izan diren kristau elkarteak. Egigun otoitz.

—Era guztietako bokazidunen alde: jakin dezatela Berari jarraitzera erruki-begiradaz deitu zien Jaunari erantzuten. Egigun otoitz.

—Jesu Kristok ikasleei emandako bakea gure munduan errotu dadin eta herri guztietatik alden daitezen gorrotoak eta gerra guztiak. Egigun otoitz.

—Gaixoek, behartsuek eta sufritzen duten guztiek Kristo piztuarengan aurki ditzaten argia eta itxaropena. Egigun otoitz.

—Jainkoak kristau familietan sakonera begira jartzen gaituen Espiritua isur dezan, elizaren ministeritza ezberdinetarako bokaziodunak erne daitezen. Egigun otoitz.

Jainko Jauna, Aita ahalguztiduna, ezinduari osasuna ematean Kristo piztuaren argia ikusarazi zenuen; batu itzazu zeure familia bakarrean bekatuak sakabanatzen dituen gizakiak, eta egizu, Zure artaldeko kide izateaz poztu daitezela Kristo, Artzain onarekin bat eginik. Errege bizi baita, hilezkor eta aintzatsu, gizaldi eta gizaldietan.

Eukaristiaren liturgiari oharpena

Egitera goazen diru-bilketa, Misio herrietako apaiz bokaziodunei laguntzeko izango da.

Jaunartze-ondorengo otoitza

**Artzain Ona, zaindu maitasunez zeure artaldea;
eta eraman betiko larre gurietara
zeure Semearen odol baliotsuaz salbatu dituzun ardiak.
Jesu Kristo gure Jaunaren bitartez.**

Bedeinkapen nagusia (*Ikus liburuxka honetako 76. orrialdean*)